

ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ
Ո Ր Ո Շ ՈՒ Մ

«28» դեկտեմբերի 2013թ.

N 984-Ն

ք. Ստեփանակերտ

**ՊԻՏԱՆԻՈՒԹՅԱՆ ԺԱՄԿԵՏՈՒՄ ՉԻՐԱՑՎԱԾ՝ ԴՐՈՇՄԱՎՈՐՎԱԾ
ԱՊՐԱՆՔՆԵՐԻ ԴՈՒՐՍԳՐՄԱՆ ԿԱՐԳԸ ՍԱՀՄԱՆԵԼՈՒ ՄԱՍԻՆ**

«Առևտրի և ծառայությունների մասին» Լեռնային Ղարաբաղի Հանրապետության օրենքի 9.7-րդ հոդվածի 5-րդ մասին համապատասխան՝ Լեռնային Ղարաբաղի Հանրապետության կառավարությունը **ո ր ո շ ու մ է**.

1. Սահմանել պիտանիության ժամկետում չիրացված՝ դրոշմավորված ապրանքների դուրսգրման կարգը՝ համաձայն հավելվածի:

2. Սույն որոշումն ուժի մեջ է մտնում պաշտոնական հրապարակման օրվան հաջորդող տասներորդ օրը և կիրառվում է 2014 թվականի հունվարի 1-ից հետո Լեռնային Ղարաբաղի Հանրապետությունում արտադրված և Լեռնային Ղարաբաղի Հանրապետություն ներմուծված ապրանքների նկատմամբ:

ԼԵՌՆԱՅԻՆ ՂԱՐԱԲԱՂԻ
ՀԱՆՐԱՊԵՏՈՒԹՅԱՆ ՎԱՐՉԱՊԵՏ

Ա. ՀԱՐՈՒԹՅՈՒՆՅԱՆ

Կ Ա Ր Գ

ՊԻՏԱՆԻՈՒԹՅԱՆ ԺԱՄԿԵՏՈՒՄ ՉԻՐԱՑՎԱԾ՝ ԴՐՈՇՄԱՎՈՐՎԱԾ ԱՊՐԱՆՔՆԵՐԻ ԴՈՒՐՍԳՐՄԱՆ

1. Սույն կարգով կարգավորվում են «Առևտրի և ծառայությունների մասին» Լեռնային Ղարաբաղի Հանրապետության օրենքի 9.2-րդ հոդվածով սահմանված՝ Լեռնային Ղարաբաղի Հանրապետության տարածք ներմուծված կամ Լեռնային Ղարաբաղի Հանրապետությունում արտադրված պիտանիության ժամկետում վերջնական սպառողներին չիրացված, դրոշմապիտակներով դրոշմավորված այն ապրանքների դուրսգրման հետ կապված հարաբերությունները, որոնց վրա, «Սննդամթերքի անվտանգության մասին» Լեռնային Ղարաբաղի Հանրապետության օրենքի 8-րդ հոդվածով և «Սպառողների իրավունքների պաշտպանության մասին» Լեռնային Ղարաբաղի Հանրապետության օրենքի 6-րդ հոդվածի 3-րդ մասով սահմանված պահանջներին^{*)} համապատասխան, մակնշված է ապրանքի պիտանիության (այսուհետ՝ պիտանիության) ժամկետը:

2. Սույն կարգի կիրառման առումով, պիտանիության ժամկետը լրացած ապրանքներ են համարվում նաև սույն կարգի 1-ին կետում նշված՝ արտադրված և դրոշմավորված այն ապրանքները, որոնք հաստատված տեխնոլոգիական փաստաթղթերի հիման վրա իրականացված լաբորատոր ուսումնասիրության արդյունքներով համարվել են իրացման համար ոչ պիտանի և արտադրողի կողմից չեն օտարվել կամ իրացնողների կողմից տվյալ ապրանքի պահպանման տեխնոլոգիական պայմանները չպահպանելու պատճառով մինչև պիտանիության ժամկետի լրանալը կորցրել են սպառողական հատկանիշները և վերադարձվել են անմիջական արտադրողներին կամ ներմուծողներին:

3. Պիտանիության ժամկետում չիրացված ապրանքները սույն կարգին համապատասխան դուրս գրելու իրավունք ունեն միայն «Առևտրի և ծառայությունների մասին» Լեռնային Ղարաբաղի Հանրապետության օրենքի 9.1-ին հոդվածի 2-րդ մասի համաձայն դրոշմապիտակներով դրոշմավորման պարտավորություն կրող՝ պարտադիր դրոշմավորման ենթակա ապրանքներ Լեռնային Ղարաբաղի Հանրապետության տարածք «Ներմուծում ազատ շրջանառության համար» մաքսային ռեժիմով ներմուծող և Լեռնային Ղարաբաղի Հանրապետությունում այդպիսի ապրանքներ արտադրող կազմակերպությունները և անհատ ձեռնարկատերերը (այսուհետ՝ անձինք):

4. Պիտանիության ժամկետում չիրացված ապրանքները սույն կարգին համապատասխան դուրս են գրվում արտադրողի կամ ներմուծողի առնվազն երեք անդամից բաղկացած՝ կազմակերպության ղեկավարի կամ անհատ ձեռնարկատիրոջ հրամանով (կարգադրությամբ)

ստեղծված պիտանիության ժամկետում չիրացված ապրանքների դուրսգրման հանձնաժողովի միջոցով:

5. Պիտանիության ժամկետը լրացած՝ արտադրողի կամ ներմուծողի մոտ առկա ապրանքների (ապրանքային մնացորդների) առկայությունը կազմակերպություններում հիմնավորվում է հաշվապահական հաշվառման փաստաթղթերով, իսկ անհատ ձեռնարկատերերի մոտ՝ հաշվառման տվյալներով: Մատակարարման պայմանագրով գնորդներին առաքված կամ կոմիսիայի կամ գործակալի անունից հանդես գալու պայման նախատեսող գործակալական պայմանագրով՝ իրացում կազմակերպող անձանց տրամադրված և հետագայում պիտանիության ժամկետը լրացած ապրանքների հետ ընդունումը հիմնավորվում է ընդունման-հանձնման ակտով (ակտերով), իսկ *հարկային հաշիվ դուրս գրված լինելու դեպքում՝ նաև ճշգրտող հարկային հաշիվ²⁾* առկայությամբ: Հանձնարարության կամ պրինցիպալի անունից հանդես գալու պայմանագրի հիման վրա իրացում կազմակերպող անձանց տրամադրված և հետագայում պիտանիության ժամկետը լրացած ապրանքների հետ ընդունումը հիմնավորվում է ընդունման-հանձնման ակտերով:

6. Պիտանիության ժամկետը լրացած ապրանքների դուրսգրման գործընթացը ներառում է՝

1) անմիջական արտադրողի կամ ներմուծողի մոտ դուրսգրման ենթակա ապրանքային մնացորդների կամ իրացված ապրանքների հետ ընդունումը հիմնավորող փաստաթղթերի ուսումնասիրությունը.

2) դուրսգրման ենթակա ապրանքների քանակների արձանագրումը (հաշվարկը).

3) փաստացի քանակների արձանագրման արդյունքների և սույն կարգի 5-րդ կետում նշված փաստաթղթերում նշած քանակների հանրագումարին համապատասխանությունը՝ ըստ ապրանքների անվանումների (մակնիշների), տարողությունների (*ծավալների, քաշերի կամ տվյալ ապրանքատեսակին բնորոշ չափման այլ միավորների*)^{*)}.

4) դուրսգրման ենթակա ապրանքների փաստացի քանակությամբ, բայց ոչ ավելի փաստաթղթերով հիմնավորված քանակից, պիտանիության ժամկետը լրացած ապրանքների դուրսգրման վերաբերյալ համապատասխան ակտի կազմումը.

5) դուրս գրվող ապրանքների ապրանքային տեսքի փչացումը և ապատարայավորումը (*ապափաթեթավորումը*)^{*)}.

6) սահմանված սանիտարական և բնապահպանական նորմերին համապատասխան դուրս գրվող ապրանքների ^{*)} դուրսգրման ընթացքում առաջացող թափոնների վնասագերծումը կամ վերամշակումը.

7) հարկային հաշվառման մեջ, իսկ կազմակերպությունների դեպքում հաշվապահական հաշվառման մեջ դուրսգրման արդյունքների վերաբերյալ Լեռնային Ղարաբաղի Հանրապետության օրենսդրությամբ սահմանված կարգին համապատասխան ձևակերպումների կատարումը:

7. Դուրսգրման ենթակա քանակների արձանագրումը (որոշումը) իրականացվում է ըստ ապրանքատեսակների և տարողությունների (*ծավալների, քաշերի կամ տվյալ ապրանքատեսակին բնորոշ չափման այլ միավորների*)^{*)}: Դուրսգրման ենթակա են ապրանքների փաստացի քանակները, սակայն ոչ ավելի փաստաթղթերով հիմնավորված՝ համապատասխան քանակներից:

8. Պիտանիության ժամկետը լրացած ապրանքների դուրսգրման գործընթացն սկսելուց առնվազն երկու աշխատանքային օր առաջ արտադրողը կամ ներմուծողը հարկ վճարողի հաշվառման վայրի հարկային մարմին է ներկայացնում գրություն պիտանիության ժամկետը

լրացած ապրանքների դուրսգրում իրականացնելու վերաբերյալ՝ նշելով դուրս գրվող ապրանքների գտնվելու վայրի (դուրսգրման վայրի) և դուրսգրման գործընթացն սկսելու ժամի վերաբերյալ:

9. Հարկ վճարողի հաշվառման վայրի հարկային մարմնի ղեկավարի հրամանի հիման վրա հարկային ծառայողը (ծառայողները) իրավունք ունի (ունեն) մասնակցելու դուրսգրման գործընթացի բոլոր փուլերին, բացի դուրսգրման արդյունքների ձևակերպումից: Հարկային մարմնի ղեկավարի հրամանի օրինակը ներկայացվում է կազմակերպության ղեկավարին, անհատ ձեռնարկատիրոջը:

10. Պիտանիության ժամկետը լրացած ապրանքների դուրսգրման գործընթացին հարկային մարմնի աշխատողի չներկայանալը հիմք չէ դուրսգրման գործընթացի իրականացումը հետաձգելու կամ չիրականացնելու համար:

11. Պիտանիության ժամկետը լրացած ապրանքների դուրսգրման գործընթացին մասնակցող հարկային ծառայողն իրավունք ունի ստուգելու դուրս գրվող ապրանքների վրա պիտանիության ժամկետների առկայությունը և դրանց լրացված լինելու հանգամանքը, դուրս գրվող ապրանքների համապատասխան տեսակի և տարողությամբ (*ծավալով, քաշով կամ տվյալ ապրանքատեսակին բնորոշ չափման այլ միավորով*)^{*)} դրոշմապիտակներով դրոշմավորման փաստը, դուրսգրման գործընթացը սույն կարգին համապատասխան իրականացված լինելու հանգամանքը:

12. Պիտանիության ժամկետը լրացած ապրանքների դուրսգրումը ձևակերպվում է ակտով, որում նշվում են դուրսգրման ենթակա ապրանքների քանակները՝ ըստ անվանումների (մակնիշների), տարողությունների (*ծավալների, քաշերի կամ տվյալ ապրանքատեսակին բնորոշ չափման այլ միավորների*)^{*)}, պիտանիության ժամկետը լրացած ապրանքների մասով՝ ժամանակագրական կարգով ամենավերջին այն պիտանիության ժամկետը, որը նշված է եղել դուրս գրվող ապրանքների վրա, մինչև պիտանիության ժամկետը լրանալը դուրս գրվող ապրանքների մասով՝ պիտանիության ժամկետը, դուրս գրվող ապրանքների ապրանքային տեսքի փչացման և ապատարայավորման (*ապափաթեթավորման*)^{*)} ու ակտավորումից հետո ապրանքների ոչնչացման արդյունքում առաջացած թափոնների վնասագրեծման, վերամշակման կամ որպես երկրորդային հումք օգտագործելու եղանակները:

13. Դուրս գրվող ապրանքների ապրանքային տեսքի փչացումից և ապատարայավորումից (*ապափաթեթավորումից*)^{*)} հետո դուրսգրման ակտն ստորագրվում է դուրսգրման հանձնաժողովի անդամների և կազմակերպության ղեկավարի (անհատ ձեռնարկատիրոջ կողմից), իսկ դուրսգրման գործընթացին հարկային մարմնի աշխատողի մասնակցության դեպքում՝ նաև վերջինիս կողմից: Հարկային ծառայողն իրավունք ունի ակտում կատարելու գրառումներ դրոշմավորման կանոնների, սույն կարգի դրույթների պահպանման վերաբերյալ: Հարկային մարմնի աշխատողի ստորագրությամբ ակտի մեկ օրինակը տրվում է այդ աշխատողին, ով այն հանձնում է հարկային մարմին՝ հարկ վճարողի անձնական գործում պահելու համար:

14. Պիտանիության ժամկետը լրացրած ապրանքների դուրսգրման վերաբերյալ տվյալները (*այդ թվում՝ ակտի կազմման ամսաթիվը*) արտացոլվում են դրոշմապիտակների ձեռքբերման համար վճարված գումարը հարկային պարտավորությունների դիմաց հաշվանցման և (կամ) հարկ վճարողին վերադարձման դիմումի մեջ, ինչպես նաև ձեռք բերված դրոշմապիտակների օգտագործման հաշվետվության մեջ:^{*)} Դրոշմապիտակների օգտագործման մասին հաշվետվությունը ներկայացվում է «Առևտրի և ծառայությունների մասին» օրենքի 9.3-րդ հոդվածի 4-րդ մասով սահմանված դեպքում, ինչպես նաև դրոշմապիտակներով դրոշմավորման ենթակա

ապրանքների արտադրության դադարեցման դեպքում՝ մինչև դադարեցման օրը ներառող ամսվան հաջորդող ամսվա 20-ը ներառյալ:^{*2)} Մատակարարման պայմանագրով գնորդներին առաքված և պիտանիության ժամկետը լրանալու պատճառով գնորդներից հետ ընդունված՝ փաստաթղթերով հիմնավորված քանակներին, ապրանքների տեսականուն, տարողություններին (ծավալներին, քաշերին կամ տվյալ ապրանքատեսակին բնորոշ չափման այլ միավորներին)^{*1)}, բացթողման գներին համապատասխան սահմանված կարգով կատարվում են հարկման հիմք հանդիսացող շրջանառությունների ճշգրտումներ՝ ըստ մատակարարումների ժամանակաշրջանների:

15. Սույն կարգին համապատասխան դուրս գրված՝ պիտանիության ժամկետը լրացած ապրանքների մասով հարկային պարտավորություններ չեն առաջանում: Պիտանիության ժամկետը լրացած, ինչպես նաև Լեռնային Ղարաբաղի Հանրապետությունից արտահանված ապրանքների դրոշմավորման համար դրոշմապիտակների ձեռքբերման համար վճարված գումարները ենթակա չեն նվազեցման հարկ վճարողի հարկային պարտավորություններից:

Շահութահարկով հարկման նպատակով պիտանիության ժամկետը լրացած և սույն կարգին համապատասխան դուրս գրված ապրանքների վրա փակցված դրոշմապիտակների ձեռքբերման համար վճարված գումարները նվազեցվում են համախառն եկամտից՝ օրենքով սահմանված կարգով:

**ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ
ԿԱՌԱՎԱՐՈՒԹՅԱՆ ԱՇԽԱՏԱԿԱԶՄԻ ՂԵԿԱՎԱՐ**

Լ.ԳՐԻԳՈՐՅԱՆ

*1) ԼՂՀ կառավարության 20.11.14թ. «Լեռնային Ղարաբաղի Հանրապետության կառավարության 2013 թվականի դեկտեմբերի 28-ի N 984-Ն որոշման մեջ փոփոխություններ և լրացումներ կատարելու մասին» N 768-Ն որոշման խմբագրությամբ

*2) ԼՂՀ կառավարության 11.11.19թ. «Լեռնային Ղարաբաղի Հանրապետության կառավարության 2013 թվականի դեկտեմբերի 28-ի N 984-Ն որոշման մեջ փոփոխություն և լրացում կատարելու մասին» N 922-Ն որոշման խմբագրությամբ